



Marco Engel (a dretga), il manader da la Higa, en discurs cun trais visitaders da l'exposiziun.

FOTOS G. N. STGIER

«Ella è il Chalandamarz da Cuira»

Cuira: Avertura da la 62. Higa

DA GION NUTEGN STGIER / ANR

■ Per l'emprima giada en sia istorgia da sis decennis ha l'exposiziun lieu per in pau pli baud che fin ussa. Da la partida èn 200 expositurs. La Higa saja attractiva ed er innovativa, ha ditg cusseglier guvernativ Mario Cavigelli en ses pled d'avertura. Ils davos passa 60 onns ha la Higa adina gi lieu l'emna d'Ascensiu, vul dir adina il mais da matg. Quest onn ha l'exposiziun avert per in pau pli baud sias portas. Sonda ha gi lieu l'avertura da la 62avla ediziun da la Higa e quai en preschientscha da blera prominenz da la politica, da l'economia e dal turissem.

Collisiun cun autras exposiziuns nazionalas

Marco Engel, il manader da la Higa, ha beneventà mintga singul envidà persunalmain. En ses pled ha el ditg ch'el speria che l'interess dals visitaders saja uschè grond sco quel dals giasts envidads. Lur preschientscha conferma che la Higa saja anc adina fitg populara. Che la 62avla exposiziun da commerzi ed industria haja lieu pli baud haja intginas raschuns. Dapi diesch onns saja il spustament da la Higa dal mais da matg gia en il mais da mars in tema tar ils organisaturs. Ultra da quai haja l'exposiziun grischuna mintga trais onns er adina gi ina collisiun cun autras exposiziuns nazionalas sco per exempel la «Bea» e la «Luga», ha ditg

Engel. Gist quella realitad aveva ina ferma influenza sin il dumber dals expositurs, ha menziunà il manader da la Higa.

Duas dumengias

Il mais da matg sajan las temperaturas a Cuira savens pulit autas uschia che blera glieud renunzia da visitar la Higa cun giudair l'aura empernaivla cun star sut tschiel avert. Il mais da mars saja quai na anc il cas, quai che saja er per ils expositurs en las tendas pli agreabel, ha punctuà il directur da la Higa. L'exposiziun cuzza da nov nov dis, ed enstagl Ascensiu, fin uss adina in di cun in grond public, haja quella a disposiziun duas dumengias. Cun spustar la data da la Higa sin il mais da mars vulesan ils organisaturs er annunziar a Cuira la primavaira, quai che las numerusas plantinas da flurs en las hallas conferman er, ha ditg Engel. Ditg auter: «La Higa è il Chalandamarz da Cuira», per duvrar quella expressiun, ha menziunà il manader da l'occurrenza da commerzi ed industria. El ha er ditg che la Higa haja in public fidaivel e cunzunt er expositurs fitg fidaivels cun 80% da quels esser gia dapi diesch onns adina da la partida.

Tradiziun ed emoziuns

Cusseglier guvernativ Mario Cavigelli ha ditg en ses pled d'avertura che la Higa saja en emprima lingia in event ed ina occurrenza. Vesair ed esser vesì, quai tutgia

er tar la Higa. L'exposiziun sa drizza a pliras generaziuns, quant ditg che la visita cuzza, quai sa lascha strusch planisar, ha ditg il president da la regenza cun in surrir. La Higa saja dentant er fatschenta, societad, tradiziun, emoziuns, tgira da clients e mantegnair ils contacts. L'exposiziun saja er adina attractiva e lura er innovativa, ha menziunà Cavigelli.

Quatter exposiziuns spezialas

Sco mintg'onn datti er quest onn quatter exposiziuns spezialas. Ina da quella è: Il chaun – mes meglier ami. Che chauns han abilitads extraordinarias che gidan per exempel da salvar la vita a persunas mussa l'exposiziun speziala. Preschentažiuns sin la tribuna da la Higa mussan tge spectrum da talents ch'ils amis cun quatter chommas han. Ils battasendas dal Grischun pon festivar quest onn il giubileum da 100 onns. Sper in center d'infurmaziun envidan differentas purchidas uffants e giuvenils d'emprerder ad enconuscher ils battasendas. Tut quels che vulevan gia daditg far sez in surfboard, skateboard, snowboard, ubain skis, quels chattan tips e materials per construir l'agen board en l'exposiziun speziala «Enlain». Ils servetschs da l'Institut d'assicuranza sociala dal chantun Grischun SVA enconuschan ils blers mo pauc. En pled e maletg vegn er preschenta quel servetsch e quai fin ils 25 da mars, l'ultim di da la Higa 2018.



Il cusseglier nazional Duri Campell (a san.) e Franz Sepp Caluori, il president da Gastro Grischun.



La deputada Christine Bucher-Brini cun Renato Fasciati, il directur da la Viafier retica.



Da la partida a l'avertura è er stà Martin Vincenz, il directur da Grischun Vacanzas.



Urs e Sara Schädler, el che stat a la testa da l'Uniu chantunala da commerzi ed industria.



Prominenz politica: Cusseglier guvernativ Mario Cavigelli e Martin Aebli, il president dal cussegl grond (da san.).



Tranter ils giasts er cussegliera nazionala Magdalena Martullo.